

C40
4514
233

C40-4574

了翁上座請大猷及有
家書置之武州紫雲山
我微英塔院度府中來
為學者不敢不出院因
當山二世鐵牛樹謹誌



B 64853



肇論新疏游刃卷下

五臺萬聖禪寺開住持釋源奩為寺宇贈邱國公海印開法真覺大師長講問文不述

疏涅槃者下初略釋通名通名有三謂圓寂滅度無
為後二如下論自釋唐譯下即唐奘公三藏法師也
常樂我淨名之四德此四且約翻無常等四倒以顯
之約治惑業苦三障以顯三德然實具恒沙無盡性
德故清涼釋之義充法界德備塵沙曰圓體窮真性
妙絕相累為寂即第一義下指體也然涅槃之體或
指三德或指真如實際等今依表中也故大經二十
七云佛性者名第一義空第一義空名為智慧等佛

又卷下

性乃涅槃因中之名如大經云是因非果如佛性是
果非因如大涅槃該通下經云空者一切生死不空
者謂大涅槃又云佛性者卽是無上菩提中道種子
等約位下凡聖因果皆名曰位二十七云一切衆生
悉有十二因緣一切衆生悉有佛性未證者二十一
云是大涅槃凡夫未到以有貪欲嗔恚愚癡故三乘
下二乘涅槃但離煩惱虛妄其實未得一切解脫二
十七云十住菩薩雖見佛性而不了了等皆顯三乘
證未盡也剋體下自性涅槃體無不遍法無不具闡
提此云無性依法相宗說五種種性有無道理此一

闡提焚燒善根謗菩薩藏法尔永無三乘不定乘等
入涅槃性若法性宗一闡提輩但是無有聞熏非無
本有佛性故大經第九廣斥闡提斷善不得成佛至
二十一經以後廣說闡提悉有佛性故二十七云一
切衆生悉有佛性乃至一闡提等亦有佛性一闡提
等無有善法佛性亦善以未來有故一闡提等悉有
佛性何以故一闡提等定當得成無上菩提故二十
一又云一切衆生悉有佛性懺四重禁除謗法心盡
五逆罪滅一闡提然後得成無上菩提等若尔何以
善戒等經說一闡提無種性故雖復勤行精進終不

能得無上菩提邪。答準清涼生公之意。但是毀責之辭。令彼不作闡提。如世之痛罵不肖之子云。此無人性。雖強力學之終無所成。彼若迴心成人。可望如來。亦尔。或曰。理性等有行性。或無此。亦曲會未盡。終極之唱何者。彼經文云。善男子。佛性者。謂其十力。四無所畏。大悲。三念處。一切衆生。悉有三種破煩惱。故然後得見闡提。亦尔。又云。一切衆生。悉有一乘。無明覆故。不能得見。據此。何獨尔邪。不滅者。二十二略云。闡提斷善。不斷佛性等。極喜者。初地也。謂此菩薩初斷二障。現行證二空。真如卽是少分見佛性。故非增者。

謂性本圓成。非新增。故出處者。易繫云。君子之道。或出或處。儒以仕進名。出守志名。處論主以有餘名。出無餘名。處如下云。生名有餘。滅名無餘。此亦略辨涅槃種類也。準出現疏。此四之外。更列性淨方便淨。或真或應等。然論皆有之。至文當示彼疏。又引唯識云。自性涅槃。衆生等有二乘。無學容有前三。唯佛世尊。獨言具四等。體用者。顯大般涅槃也。自性體也。本也。餘三用也。末也。亦可無住。體用兼含。言混成者。體時恒用。末時恒本。未有非真之應。非應之真也。細求下論。自識其玄。四而非四者。謂約出處之跡。非四而四。

約真應之源四而非四無名下初釋依秦主荅安城
侯書釋之所引卽華嚴須彌頂上偈讚品具云有諍
說生死無諍卽涅槃云二就下約自性涅槃之體明
也涅槃下二十七云十相者謂生老病死色聲香味
觸無常遠離十相者名大涅槃亦離有無之相如下
論示本經下經說有有因之名如舍利弗母名舍利
因母立名故云舍利弗弟子也有無因之名如薩婆
車多名爲蛇蓋實非蛇蓋是名無因強立名字如垣
羅婆夷名爲食油實不食油強爲立名名爲食油是
名無因強立名字善男子是大涅槃亦復如是無有

因緣強爲立名等釋曰有因無因二種之名此方亦
多物能捕鼠名曰鼠狼此有因也藥名蜜陀僧等有
何因乎皆是情想取相立名名亦何真依相立名尚
入虛假無相立名豈非強爲淨名下如常所聞徧友
下卽華嚴七十六云我聞聖者善能誘誨願爲我說
徧友荅言善男子此有童子名善知衆藝學菩薩字
智汝可問之當爲汝說等卽徧友自不荅也首唱先
言也發越也揮散也謂論主演釋無名之旨發越揮
散共稟下謂教中已有無名之言秦王與論主舉而
明之也述而不作者論語文自下釋論多依本經及

出現大疏釋之凡云大經卽大涅槃經引他經則名
之○疏表端等者端首也謂君臣之禮凡上章奏首
必稱臣臣謂臣僕男子賤稱謙禮於君也僧則國君
捨之爲方外之人是國之賓非國之臣如易之蠱卦
上九之辭云不事王侯是也古之沙門行業高者天
子不下詔沙門不上表但書相往來如晉慧遠法師
唐苑律師等亦有不免而上者如安公之諫符堅支
遁之辭晉主表首但名而已流之宋世雖三藏施護
亦自稱臣況其他乎然儒之君子亦有肥遁高尚其
事避色避世者如子陵不臣光武戴逵不友晉帝等

斯人亦多論主時方年少以方外自處能以道賓秦
不以禮臣秦故稱名而已其高可知老氏者卽三十
九章文○疏尚書等者舜典曰若稽古帝舜曰重華
協於帝濬哲文明溫恭允塞東萊解云濬者宏深與
濬川之濬相近然多見睿字睿與叡同尚書堯典云
若稽古帝堯曰放勳欽明文思安安等環中下彼篇
次前云彼是莫得其偶謂之道樞樞始得其環中等
大意謂是非互指彼此無主彼亦一是非此亦一是
非則是非皆虛也彼此無偶也無偶則一一則爲道
樞故是非往來彼此相向如環之無窮無是無非如

環中之虛也此亦少同吾宗法空之理疑亦得乎吾佛之緒餘哉武以下文武乃國之治具武可以禦外難禦止也文可以經內邦四大卽老氏第二十五中文○疏放捨等者大經第四云然後要於大般涅槃放捨身命是故名曰大般涅槃等水大貌者正取廣大之義叢筠下叢林數也筠竹也法華第一云假使滿世間皆如舍利弗盡思共度量不能測佛智又云無漏最後身其數如竹林欲思佛實智莫能知少分等今云地滿智雲卽十地菩薩亦最後身也○疏十有等者什公在關輔僅八年并去姑減十有餘年也

○疏論語下卽里仁篇同聲下繫辭云同聲相應同氣相求雲從龍風從虎等言感而會莊子者彼田子方篇大意云雪子楚人因使於齊而舍於魯所以仲尼見之文多如彼二人下繫辭云二人同心其利斷金今謂秦主什公相契始能弘法利世○論夫衆生下初則順流下轉門圓覺經云欲因愛生命因欲有等若欲下卽返流上轉門愛欲之因若滅則生死之果自喪略同者且約無相體遍之義爲喻然無知無覺不必全同是故經說涅槃於世法無喻○疏羨者讚羨也王者下謂富有四海尊極一人非獨萬姓之

君實亦三寶之主執去留之柄關盛衰之風至于歎
德景行宜其過實也○䷗謂所等者子夏詩序云情
動于中而形于言之不足故嗟歎之嗟歎之不足
故詠歌之詠歌之不足不知手之舞之足之蹈之○
論津梁者津謂津渡如津處施之橋梁也○䷗司馬
者前漢武帝時人撰史記也易本下繫辭云古者包
犧氏之王天下也仰則觀象於天俯則觀法於地觀
鳥獸之文與地之宜近取諸身遠取諸物於是始作
八卦以通神明之德等文王下謂文王每一卦之下
繇辭以明之大意如乾卦云乾元亨利貞是也周公

下卽文王之子凡卦六爻每爻各繫辭以明之如乾
卦初爻云潛龍勿用等是也孔子下謂上彖下象大
象小象上繫下繫文言說卦序卦雜卦豈曰等者亦
謙也○䷗末章等者謂秦主荅姚嵩之書而有兩端
一荅無爲宗極二破空寂無聖今則後端也不容有
聖者謂絕智淪虛似小乘無餘之說莊子下彼逍遙
篇略云肩吾問於連叔曰吾聞言於接輿大而無當
往而不反太有逕庭不近人情等○䷗文借下二十
一文借以顯理○䷗疑蓋者謂五蓋之中疑爲一也
扣擊也宜用叩字叩頭也然文法凡虛心求理皆名

爲叩如論語云我叩其兩端而竭焉圭峯亦云課虛
叩寂是也今用扣字謂扣擊玄關義亦可通但犯籠
猛恐後人叅正之訛○疏作意下傳云什亡之後追
悼未往翹思彌厲乃著涅槃無名論等翹舉也思謂
哀思時舉未嘗放也厲嚴也或排下小乘以生死爲
界內涅槃爲界外如下有名云然則衆生之性頓盡
於五陰之內涅槃至道獨建於三有之外等今大乘
衆生卽涅槃體無不適用無不極何有界內界外之
殊也○疏條謂等者謂將演論條段布列於文牒之
上繕管也班布也○疏西來下謂五天竺國鄉音不

同如此方燕鄉越里之殊呼楚國秦邦之異說○疏
十演等者謂此論初略示名義直談自性清淨之體
以爲宗極然後折而演之做法也命召也彼云開宗
明義章第一謂於此一章亦略張孝道之宗明其孝
爲至德要道之本然後述天子諸侯等五人所行不
同同歸于孝○疏欲明等者謂小乘教中唯說此二
爲究竟之果未知此二應物之迹故假有名爲難論
主以一實之理破此二權直示大方故以無名爲演
折者如水壅塞演者如水決通然九折之義或唯二
乘如初三折或通三乘則第四難差以下皆三乘義

至文隨示而十演之義皆一乘也竟顯下謂無之迹
有雖殊而自性之體無異○䟽無爲等者料揀二名
隨義殊也言無爲者謂四相不遷三際莫易又性出
自古亦無作法及與作者息障卽三障也論略示惑
苦生死大患也欲見下此四種惑名四瀑流故本經
二十七云一者欲瀑二者有瀑三者見瀑四者無明
瀑釋曰欲界之惑除無明名欲瀑上二界惑亦除無
明名有瀑身等諸見名見瀑三界無明名無明瀑此
四能漂有情入生死海故云瀑流○䟽義言宅也者
二十七經云又涅槃者名爲屋宅能遮煩惱惡風雨

故等○䟽出現下經有十門第一名體性真常門經
說真如實際等爲涅槃故廣引恐繁初二對下無聲
故寂離名也無色故寥離形也由雙離故虛虛則無
所不遍故曠也曠遠也大也非有非無微也不出不
在妙也離此諸相故曰無相妄知有心不能知也前
離下用論卽彼真如門中文群有下謂四洲四惡趣
四空并四禪無想與淨居梵王六欲天以二十五有
屬三界苦果故本經第十云說正解脫無二十五有
等量等者齊等也據求久亦常義䟽欲配成四倒故
云非空非前下踵去曰隨逆來曰迎卽過未也餘可

知此約下明離四權潛影四實謂離苦顯樂等亦如下彼二十五云吾不知其名字之曰道強爲之名曰大大曰逝等釋曰逝往也言道之大無往而無也往而愈極故曰遠也非獨於遠亦反於近言無不在也然論文亦多擬老氏如彼第十四云無狀之狀無象之象是謂恍惚迎之不見其首隨之不見其後等故世之淺近者謂此論雜莊老之談未知乎假辭以明玄理也問莊老談道亦數當矣與內教何似淺深峇佛教宏深恢懿非予所盡識悟姑以所得毫芒之見而擬之吾宗玄妙但說我之本心此心之體虛寂也

之用靈明也八萬塵勞本離也恒沙性德本具也迷是心而凡夫悟是心而聖人迷悟唯轉此心心外別無一法莊老言道或謂道降冲和萬物稟之以生成或謂萬物自然而然無張無主率皆心外談理有外明無細研二家天壤自遠五眼者一肉眼見障內之色二天眼見障外之色三法眼了諸法之相四慧眼了諸法之性五佛眼則悉徹性相問肉天法眼不見可尔慧眼佛眼云何不見甚違本經如來了了見於佛性峇二眼俱離見相無能所取故云不見如無知論云明逾日月而迷昏等華嚴下第二十八經○疏

莊公下後二句云一質不成淨穢虧盈異質不成一
理齊平○䟽通引等者須菩提無說釋梵無聞故云
兼也反證者謂引無言證前言者失真故也法華下
彼第一云於三七日中思惟如是事等大品卽第八
九卷以來該數品經○䟽斯皆者下謂唯內證聖智
與之相應言說轉遠也○論不晦等者謂涅槃之體
離晝夜寒暑之相亦可昭昭於心目之際不晦也寂
寂於名相之外不明也餘義如下故䟽義引等者然
經文皆廣不能繁叙今取義釋之準法華經小乘以
離虛妄名爲解脫其實未得一切解脫一切解脫真

解脫也○䟽初二對等者謂有境尋之而五陰蕭然
非有也無鄉求之而靈鑒昭然非無也二種生死皆
苦陰也與理下謂理智如如非二也亦文撫老氏彼
云抱一爲天下式等捐棄也亦本來棄離非適也三
事卽三德祕藏如前宗中神而等者由常湛寂亡照
故不居其功由無功故至功之用立無息者下云亭
毒蒼生踈而不漏等經卽第四卷義用也若各下體
用各示超取其文也用可例說者靈不竭故抱一抱
一故神而無功無功故至功存功存故非無也自性
涅槃體用融通大經二十一云如來涅槃非有非無

等○疏四無色者卽空無邊處等也準禪法要解略云一空無邊處謂觀色是苦若內若外分分析破度一切色相等二識無邊處謂知空中受想行識如病如癰更求妙定則離空緣知是虛空從識而有謂之爲真但觀於識等三無所有處行者得識處已更求妙定觀識爲幻不住情不住緣不住中間如是思惟得離識處四非想非非想處謂一切想地皆籠可患如病如癰如是觀已則離無所有處入非想也謂無下地籠想名非想有當地微細想故名非非想故云四空九地者謂欲界一五趣雜居地色界四初禪離

欲界生名離生喜樂地二禪名定生喜樂地三禪名離喜妙樂地四禪已離喜樂之念名捨念清淨地兼無色四名九地也治世等者班固前漢藝文叙云一曰儒流卽周孔等二曰道流卽莊老等三曰陰陽流卽堯師具茨等四曰法流卽臯陶甫刑等五曰名流卽高辛氏師赤松子置五行之官等六曰墨流卽墨翟禽滑等七曰縱橫流卽蘇秦張儀等八曰雜流兼儒墨合名法議國之事九曰農流卽神農后稷等馬遷則先黃老而後六經衆聖所會者智論云魚歸於水鳥歸於林聖歸涅槃法歸分別殊途等繫辭文○

疏王宮下託寄託也謂示生淨飯王宮○疏難測用
也道約喻也○疏三乘等者以有餘無餘三乘之教
皆有釋義大同小異若小教菩薩亦唯此二大心大
行則別斷證位次則同有宗云身智未盡名有餘若
大乘者大鈔引遠公云二死因盡名有餘若法相則
通說四種唯識云一有餘依涅槃謂卽真如出煩惱
碍雖有微苦所依未滅而障未寂故名涅槃等此論
有名者但折二種不折所餘乘如下謂乘運三十七
菩提分法來至道樹而成正覺此釋如來也揀於下
謂二乘菩薩雖亦名覺覺而未極佛果覺圓故稱大

也小乘以戒定慧解脫解脫知見爲五分法身依報
下毘婆沙第一云色身是法身器法身所依故據此
則以法身依報身也八解者下俱舍二十九云解脫
有八種一內有色想觀外色解脫二內無色想觀外
色解脫三淨解脫身作證具足住四無色定爲次四
解脫滅受想定爲第八解脫八中前三無貪爲性次
四各以本地定善爲性第八解脫卽滅盡定等謂念
下擇法精進喜念定捨輕安爲七覺支大小下大鈔
引小乘教說菩薩別修六度各有滿時仍滿在頂位
依四諦理發四弘誓由苦諦故發度衆生集諦故斷

煩惱滅諦故成佛果道諦故修萬行至忍位中趨菩提樹世第一心已去緣上下八諦發苦法智忍等一十六心兼緣九地修惑起九無間九解脫斷惑證理以菩薩根利故五門合斷此義極多且略示一隅大乘教理如常釋之○疏三明者俱舍二十七云一宿住智證明二生死智證明三漏盡智證明初心下卽衆生無邊誓願度也○疏弱喪者弱幼弱也喪失也謂幼弱而喪失鄉國也北山錄云使弱喪知其所歸食椹懷其好音是也以喻群生失本性地入生死之野尔凡二十已下名弱二空者謂我法二空大乘之

理也八正下持世經入聖道品略云一正見離諸邊邪見故二正思惟斷諸分別故三正語知言虛故四正業滅諸邪業故五正命捨資生販賣故六正精進離相運行故七正念離諸邪念故八正定離諸定相故然經文極廣義皆實相與小乘八正乃別今取意略引以入正大小諸宗皆有故引大也庶孽者庶衆也亦凡庶也孽賤之稱也亦妖也五乘者三歸五戒人乘十善天乘四諦小乘十二因緣中乘六度大乘化儀者化生儀式也○疏初二句下釋如來隨宜之應意兼下詳下論意如來本欲趣寂但餘緣未了故

住有餘據此出生入死往來化物不在報身在隨類
化身也以化依報起故就報身示之化博者八正之
道普霑一切也五衍者謂說五乘之法以接五種之
機化母者謂造化生物名化母依道書卽氣也彼初
章云有名萬物之母五十二又云天下有始以爲天
下母等若云道生之德畜之則亦以道爲母也窮盡
下依天台判小乘教明因緣生滅四真諦理論中但
言因緣始物以攝因緣終物如馬勝比丘云諸法從
緣生緣離法卽滅○疏初句下所證之理喻虛宇也
窮三世時遍十方際故云無疆九止者古譯如人本

欲生經○疏通有等者始自鹿苑終至涅槃十仙外
道等皆餘緣也然皆小智所見執化爲報以權爲實
○疏初二句下法喻雙明可知意以靈覺獨存通證
緣跡未泯○疏緣跡等者順論釋之若依成實生死
果盡名無餘若大乘則二死果盡也唯識云三無餘
依涅槃謂卽真如出生死苦煩惱旣盡餘依亦滅衆
苦求寂故名涅槃○疏文有等者初對厭身身爲大
患生死本故次對厭智智乃勤勞之本故老氏下第
十三文然八大人覺亦云心是惡源形爲罪藪但欲
對治我法二執非如小乘一向厭之以迷背之心而

生惡覺謂心爲惡○疏欲養等者世之聲利養形之物也非智慮之勞不能致之故千思百慮晝夜孜孜越分而謀抵死而竟未得起反側之思既得防劫篋之患至於神疲情困死而後已此則爲其形而勞其智故身者智之讐也厭其身則讐亡矣智既下謂身之勞役由智使之晝營夕爲春耕秋穫商胡販越輕風雷之千辛航海梯山重錐刀之薄利而形勞弗已日入不息者皆汝心智使之而智者實身之寃也與其存之而苦不若寂滅爲樂相役者心役身故令身口作業身役心故令心智作業十業旣成三報必感

故生死長途等如疏金剛經疏序云惑業襲習報應綸輪塵沙劫波莫之遏絕○疏至人等者小乘依滅盡定化火焚身名灰身也群有者九有三有等無爲益者以小乘涅槃是擇滅無爲故究竟不退故涅槃非無常故○疏燈火等者約法分喻以成四物膏油也以燈依四緣方起一燈二油三炷四火謂以燈之總相喻身燈之體性喻智又以膏喻形明喻慮然法喻有少不齊智者不難○疏五陰下色蘊卽身四蘊卽心心所心亦智也○疏初二句等者謂名隨理義而生好滅者清凉云謂有一類厭生死苦又聞佛道

長遠心生怯弱常欲趣寂也懷德者卽小教中六度菩薩據此二乘好無餘菩薩慕有餘也後之下謂本之於教則教亦明示求之於跡則古佛道同○疏五音者謂宮商角徵羽也○疏出現下略引具云然此文中雖明現身卽是三德涅槃之中所流用大亦涅槃攝有無下等者謂虛推涅槃出有無之外無形無名細求論旨不知歸處言無實也措投也舉也○疏日也下以喻顯理疏以法間而釋之暗室無聞皆喻機也○疏外稱等者謂約出處之跡以名之但謂涅槃尚亦強立况有無跡名非外邪○疏由言等者謂

依言求理之士多封名志存義相之人多著相也引稜伽卽唐譯第三卷偈○疏初二句下謂名相之極盡在題目等方圓卽相也易繫辭云以制器者尚其象解云天象圓地象方故制器者唯方圓也象是寫字者寫猶描貌也貌音邈○疏初句等者謂通許二種涅槃是化生之權用此蓋許其是權下乃奪其非實此中許者非許有名執實之謂但許有無是權故論云信是等縱有下對機明權宜約身明隱顯故成二也○疏奪也下一對破於前可知○疏顯超下謂四相之中生相爲始滅相爲終三際過現未也今

已斷之混一非殊故本經二十八云涅槃無因無所作故乃至無處所故無始終故六入者內六入也根卽情根今言已過者無漏善色不偶塵也界繫下界內惑業已除後報不起也遮表下方謂方所不在方遮也古人云道無方行者莫能至不離方表也古德云非中非外洞徹十方亦遮表無違出現云佛子如來身者無有方處非實非虛等非有爲等唯是雙遮皆影顯其表非有爲表卽無爲也餘句例知皆古下今經亦廣阿闍佛品略云我觀如來前際不來後際不去今則不住乃至云非有相非無相等大疏下卽

出現涅槃第九體離二邊中疏也○疏承前等者論之文勢亦似論語里仁篇云君子之於天下也無適也無莫也義之與比非聲下顯自性涅槃爲應化之體身非執受者謂阿黎邪識總攝諸根名持身之識故身觸違順一一執受今至人已破此識非身之身何有執受二執者卽我法也無漏淨識涅槃之性本自無故無諍下卽前引華嚴有諍說生死無諍說涅槃諍者煩惱之異名導引也化也疾前下舉喻謂因疾起藥○疏顯無住等者謂依自性之體顯去來無住之用疏初法喻對分來實非來者應不離真故往

實非往者真卽恒應亦有無在機二跡元虛故虧盈
下潜用出現大疏十門涅槃第三名出沒常湛門經
云佛子諸佛如來爲令衆生生欣樂故出現於世欲
令衆生生戀慕故示現涅槃而實如來無有出沒等
第四名虧盈不遷門文云佛子譬如日出普照世間
於一切淨水器中影無不現普遍衆處而無來往或
一器破影便不現乃至云如來智曰亦復如是等此
則虧盈在器不在於日來去在機不在於聖本經二
十五云如閻浮人日入之時衆生不見以黑山障而
是日性實無沒入衆生不見生沒入想聲聞弟子亦

復如是○疏生滅等者謂顯跡息跡示有生滅有無
之名又因生滅故知二名外稱應生之假號也○疏
有無下意云本則無名依本示跡跡則有名名但名
跡不名于本隨跡立名名有無量又不但于有無也
故論云于何不名二十七經云涅槃云何爲字有名
稱故等如次論文○疏承前等者涅槃之用無不應
也隨應隨跡有同類之名故二十二經略云如來非
非天非非人非非鬼非非地獄畜生餓鬼等言隨類
之身皆遍也經廣多不引無擇下俗智無思感之必
應如普門一十九身楞嚴三十二應等本經卽上二

十二○疏正由下非天非人涅槃體也能天人涅槃用也謂體非一切用方一切故清涼釋涅槃非虛非實云身若是實有不可滅由非實故起滅無恒身若是虛何能起滅由非虛故能無不現皆此義也○疏現身等者謂十重他報三類化身通名爲應此應萬端皆感而形聖不爲之所以如是釋應施者以一論前後多依言相顯理故如衆生下出現品大用無涯經略云佛子如來應正等覺示涅槃時入不動三昧入此三昧已於一身各放無量百千億那由他大光明一一光明各出阿僧祇蓮華一一蓮華各有

不可說妙寶華藥一一華藥有師子座一一座上皆有如來結加趺坐其佛身數正與一切衆生數等舍具下初意猶云莫之與大謂大之無二也如春秋八世之後莫之與京京大也○疏忘乎下謂寄以小成遣乎爲大假以無名亡乎施廣顯涅槃之道用而恒體體用一致方曰大般涅槃○疏祕藏下謂三德祕藏是大涅槃菩提卽摩訶般若如出現品說涅槃爲如來智日普觀法界等準宣公論衡云菩提天語則佛陀梵言也今舉一德通證三德以此三法不並不別故可思者假令高而有頂深而有底可以圖思旣

曰無上無下故圖度絕矣天地下列子天瑞篇云夫
天地空中之一細物有中之最巨者等○䟽執跡者
迹卽二種涅槃且略下謂果分離言不容一字但示
其名以引悟入正位者淨名菩薩品云若以無生得
受記者無生卽是正位等亦但標其位次無名呼召
今謂自性清淨涅槃名殊體同○䟽幾平聲微者跡之
纖細此尚不形故云寂怕○䟽初引下彼經云吾無
生不生雖生不汙於生無形不形雖形不汙於形䟽
釋頗細不煩更示忍辱太子者報恩經第三略云過
去世波羅捺國有王聰叡仁賢第一夫人生子性善

不瞋名曰忍辱乃至云太子旣長爲六大臣所嫉父
王嬰病六臣謀損太子向太子言大王病愈須得不
瞋人眼髓爲藥太子聞之捨已眼髓奉王爲藥乃至
云尔時波羅捺王者今現我父輸頭檀是時母者摩
耶是忍辱太子者今我身是罵王者雜誦第一略云
過去世時波羅捺城邊有池池中多魚龜鷺罵中有
王名爲治國作五百罵主罵王前行右脚著獵師繻
中念言我若出脚餘罵不食而去食盡方現其脚群
罵飛去有一罵臣名曰蘇摩不捨王去王語臣言汝
代我爲王在罵前行以偈荅曰我願隨王死生不變

寧共王死勝相離生獵師聞之遂解王脚二鴈俱去
乃至云佛言鴈王卽我身是蘇摩大臣者卽阿難是
鸚鵡者僧伽羅義經上卷略云昔者菩薩現爲鸚鵡
常處于樹風吹彼樹更相切磨便有火出火漸熾盛
遂焚一山鸚鵡思惟猶如飛鴈軀止于樹故當反復
起報恩心何況於我長夜處之而不能滅火卽往詣
海以其兩翅取大海水至彼火上而洒於火或以口
洒東西奔馳時有善神感其勤苦尋爲滅火如此者
其類尤多頂生者本經第十二略云過去有王名爲
善住其王頂上生一肉炮足滿十月炮卽開剖生一

童子其形端正父王歡喜字之頂生時善住王卽以
國事委付頂生七寶具足作轉輪帝乃至云轉輪聖
王卽我身是手生者涅槃三十三云我於往昔作菩
薩時爲頂生王及手生王馬鳴菩薩撰本行讚云卑
偷王手生曼陀王頂生當知人中亦有濕生也涅槃
下具云菩薩摩訶薩受羸身時常爲衆生演說正法
或受迦賓闍羅鳥身爲諸衆生說正法故受瞿陀身
鹿身兔身象身羖羊猕猴白鴿金翅鳥龍蛇之身受
如是等畜生身時終不造作畜生惡業常爲其餘畜
生衆生演說正法令彼聞法速得轉離畜生身故然

但下釋雖生不生等也。疏有二義。一由感而起。機見生形。非如來實生。二涅槃之道。卽真而恒。應無生而不生。卽應而恒。真雖生不生。形亦例之。此則就用則能生。能形在體。則非生非形。不爲有者。下論云。處有不有。○疏初引下卽五十一略云。善男子。我已成就不滅度際。菩薩法門。住此法門。故普見十方一切世界。去來今佛。無涅槃者。除化衆生方便滅度。寺唐譯下六十八略云。鞞瑟胝羅居士告善財言。我得菩薩解脫名。不般涅槃際。善男子。我不生心言。如是如來已般涅槃。如是如來現般涅槃。如是如來當般涅槃。

我知十方一切世界諸佛如來。畢竟無有般涅槃者。唯除爲欲調伏衆生。而示現耳。善男子。我開旃檀座。如來塔門。時得三昧。名佛種無盡等正思者。謂不思之思也。故遠公云。三昧者。何思專想寂之謂也。正受圓覺。疏云。不受諸受。名爲正受。皆謂心住定中。亡思亡受。亦非泯其知照之性。故又此下大疏。十玄第九。名十世隔法異成門。謂三世隨一攝。三成九九世。不出一念。爲十故。華嚴離世間品云。菩薩有十種說。三世蓋約三世互起。爲十耳。是知下卽彼經云。善男子。我入此三昧。隨其次第。見此世界一切諸佛所謂迦

葉佛拘那含牟尼佛拘留留孫佛尸棄佛毘婆尸佛勝
觀卽毘婆尸也靈鷲下法華第五云衆生見劫盡大
火所燒時我此土安隱天人常充滿又云常在靈鷲
山及餘諸處住等莫隨下卽前引鞞瑟胝羅云我不
生心言如是如來已般涅槃等意云生心則見有去
來不生則無也本經二十一云一切諸佛無有畢竟
入涅槃者出現品云佛子如來不爲菩薩說諸如來
究竟涅槃亦不爲彼示現其事乃至云於一念中見
過去未來一切諸佛色相圓滿皆如現在等○疏四
法者有無言象也教明下法喻對示可見皆釋論中

斷字謂斷無移者以教如明鏡等喻合下謂同喻也
如前云幽谷之響明鏡之像等符符竹也古者殺竹
爲符剖而相合爲信如晉陸機云入仕帷幄出剖符
竹今取合義契者今之合同契券也襲承襲也○疏
此非等者謂此前正答無餘之難此後并破勞患之
見此見下謂以如來無漏常樂之蘊同分段有爲勞
患之身狹淺之見招深過也以謗佛故責非者先汎
責違其教理下方引教會理○疏萬機等者謂遍法
界中同時異處而感涅槃業用之身亦遍法界同時
異處而應撓亂也水澄下如前引出現文摩尼下如

前釋行雲由風氣而運雖行而非行有餘因機感而生雖動而非動谷神由呼歇而止雖止而非止無餘因感謝而滅雖靜而非靜道經下彼第六篇云谷神不死是謂玄牝謂空谷中能應人呼速疾如神正明下謂此段論文若動若靜唯明無心○疏初句下以心例身也○疏躡前等者若有象而應應乃不普心亦義同○疏機有等者謂衆生是有身有心之感如下云有心者衆庶是等如來現非身之身等應之故如來身心因衆生身心而起自性涅槃無出無沒非身非心如本經廣說○疏此身等者謂非身之身無

患非心之心無勤勞也出現下虧盈不遷門中䟽也彼䟽云法身無相故無器而不形聖智無心故無感而不應相非我有等云云金石下彼說藐姑射音山有神人焉肌膚若冰雪綽約若處子不食五穀吸風飲露乘雲氣御飛龍而遊乎四海之外乃至云物莫之傷大浸稽天而不溺大旱金石流土山焦而不熟是其塵垢粃糠將猶陶鑄堯舜者也今借其辭以顯身之無患○䟽八極等者八方極遠之稱意言極際非有極也列子湯問篇湯問革曰上下八方有極盡乎革曰無極等至于下諸經多有法華涌出品下方菩

薩至如來所合掌問訊言世尊少病少惱安樂行不
荅云善男子如來安樂少病少惱等皆俯隨世範一
往一來修敬展情蓋禮之用和爲貴也豈曰下淨名
經弟子品略云佛遣阿難問居士疾阿難自謂不能
任彼問疾憶念昔時世尊身有小疾當用牛乳持鉢
詣婆羅門家乞之時維摩詰來問我言何爲晨朝住
此我言世尊身有小疾當用牛乳故來至此維摩詰
言止止阿難莫作是語如來身者金剛之體諸惡已
斷衆善普會當有何疾阿難莫謗如來莫使異人聞
此龕言等雷居士者略鈔第十一云淨名居士現鬼

耶離城俗姓雷氏於提婆城取妻曰金姬男名善思
女名月上示跡同凡化在家衆等擬繫辭者彼云智
周乎萬物而道濟天下故不過○疏長阿舍下彼經
第三卷說在文甚多不能煩示小乘涅槃經等皆說
亦大同小異或說於純陀家食旃檀木耳羹患腹痛
或說下痢下血病困覓水至樹下令弟子四疊僧伽
黎而卧等然大經祇言背痛大乘皆爲示現小乘執
之爲實二十五經云若我所有聲聞弟子說言如來
入涅槃者當知是人非我弟子是魔伴黨邪見惡人
等豈同下小乘謂如來俱厭身智棄有餘入無餘○

疏曲見者二十一經云云何名爲聲聞緣覺邪曲見耶見於菩薩從兜率下化乘白象降神母胎乃至於此拘尸羅城入般涅槃如是等見是名聲聞緣覺曲見謬執者小乘謂有餘依身雖出煩惱尚有餘苦所依如疾時須乳熱時命扇等故厭之而歸無無則無餘苦所依爲樂也殊不知吾今此身卽是常身法身無爲無漏不墮諸數執跡爲實故論主破之會意下謂因言得意不守其言卽聽表也表外也玄根下玄妙根源根以生長爲義謂衆生等有佛性遇緣則悟故始修世善終修出世善事相下謂有無蹤跡名相

本虛採取也拔抽也出也○疏九折等者切韻云微明也亦辨明之義責謂詰責義頗相近苞舉者與包含之包通用之矣儒老下繫辭云一陰一陽之謂道孔穎達義疏云一者何無之稱也稱尺證又云易有太極是生兩儀解者亦謂太極無也兩儀有也又曰神無方而易無體老氏云有之以爲器無之以爲利又云天下之物生於有有生於無又云大象無形道隱無名等流於莊列甚多儒者太極太易之無老氏虛無自然之無名殊而理同皆謂自無生有自有入無然儒宗亦舉太極爲生物之端而不設教繫辭略

云形而上者謂之道形而下者謂之器道無也器有也只於有中以述三綱五常之道洪範人倫道家乃以虛無爲宗放棄聖智絕仁義茂禮樂見素抱朴爲修二家之源非太遠其流非太近故互爲奴主而不相入今論中假問皆簡二家有無俗諦所攝涅槃則出之此折演之大理也○疏世典等者孔子不述太古之事但自唐虞以下成書卽尚書堯典等也北山錄天地始篇具叙之鴻濛廣大之象也穹窿謂窪而高如穹帳者也磅礴亦廣闊堅重之相一生二者一氣也亦混沌也二卽陰陽亦二儀也磐古者卽人倫

之首祖也磐古生天地之間王萬八千歲頭極東足極西左手極南右手極北開目爲晝閉目爲夜吐氣成風雲吸氣爲雷霆四時行焉百物生焉一生二二生三皆老氏四十二篇文形分物兆者謂磐一眼爲日月骨肉爲山陵腸胃成江河衣毛成草木等也萬物下謂三才生萬物也叢繁也亦雜也三生萬物亦老氏文次二對者老氏第二篇云有無相生難易相成長短相形高下相傾等傾謂傾向亦謂諸法相待而起若無高則亦無下也定數者謂諸法相因而生是自然之定數○疏幽顯兩途者幽謂鬼神等顯謂

人畜等然皆屬有境恢大也內教說大身脩羅身長八萬四千由旬摩竭大魚迦樓羅鳥背闊數十萬里等莊子說北溟有魚其名曰鯤鯢之大不知其幾千里列子湯問篇說五仙山一曰岱輿二曰員嶠三曰方壺四曰瀛洲五曰蓬萊其山高下周旋皆三萬里浮留海中不得暫時仙聖毒之訴於上帝帝命禹疆使巨鼈十五舉首而戴之迭爲三番六萬歲一交焉釋曰三萬里之山鼈首戴之則鼈之首又大如山也此海之東有大人國名曰龍伯有一人欲取其鼈行數步而至五山之所一釣而連六鼈合負而趨歸其

國釋曰龍伯之人又不知乎大於鼈者幾十萬里也恠竒也律中說過去世時有三親友象獼猴鷄鳥依一尼拘律樹止共相謂言同依此樹宜相恭敬獼猴鷄鳥問象言汝憶事近遠象言我憶小時行此樹齊盡我腹象與鷄鳥問獼猴獼猴荅言我憶小時此樹舉手及頭象語獼猴汝生年多我象與獼猴共問鷄鷄言我憶雪山右面有大尼拘律樹我食果子來此便轉卽生此樹共相謂言鷄生年多象以獼猴置其頭上獼猴以鷄置其肩 upper 共遊人間從村至村從邑至邑常說偈言若人能懷法必敬諸長老現在存名

譽將來生善道時鷄說如是法人皆隨從法訓流布
汝等於我法中出家應更相恭敬如是佛法流布自
今已去聽隨長幼恭敬禮拜迎逆問訊時諸比丘聞
佛教誨比丘長幼相次恭敬禮拜又外紀說伏犧蛇
身人首神農牛首人身史記說中衍鳥身人言皆恠
奇之相也僞詐也世之諂詐之流其類尤多但不任
真而行者皆詐也莊子田子方篇云温伯雪子過魯
魯人多斲見之雪子每出見客入必歎之其僕曰每
見之客必入而歎之何邪曰人之見我者進退一成
規一成矩從容一若龍一若虎其諫我也似于其導

我也似父是以歎也然進退規矩皆形容儒者禮法
謂不任真矯激而詐怪者春秋傳鄭殺大夫伯有國
人見伯有介甲而行又齊襄公嘗殺公子彭生襄公
出獵見野豕人立而啼襄公曰彭生也襄公墮車妍
美也如西施嬈姬毛嫵之類醜陋也世傳無艷女者
齊人白頭深目長指大節昂鼻結喉肥項少髮折腰
跌胷皮膚若漆年四十不售嫁等巨大也細小也列
子湯問篇云從中州以東四十萬里得僂僂國人長
一尺五寸東北極有人名曰諍人長九寸又云江浦
之間生麼蟲其名曰螻螟群飛而集於蚊睫弗相觸

也可爲細矣莊子文者齊物篇云故爲是舉莛與楹
厲與西施恢恠慤悻道通爲一莛梁也謂梁橫楹厲
醜女也謂厲太醜施太美也亦謂物殊而道平寺也
何晏等者西晉紀云初何晏等祖述莊老立論以爲
天地萬物皆以無爲本無也者開物成務無往不存
者也陰陽恃以化生賢者恃以成德故無之爲用無
爵而貴矣王夷甫之徒皆愛重之由是朝士大夫皆
以浮誕爲美裴頠著崇有論以譏之略云夫利欲可
損而未可絕有也事務可節而未可全無也盖有飾
爲高談之具者深列有形之累盛稱空無之美形器

之累有微空無之義難檢又云處官不親所職謂之
雅遠奉身散其廉操謂之曠達又云甚者至於裸形
褻慢無所不至士行又虧矣論主下謂有名所徵之
意總括儒老有無之說恐謂涅槃妙理亦不出此故
論主演超境一章以遣之○疏數名等者謂慧數是
盡惑業之緣所顯生空之理名爲滅諦無漏下見道
已去名爲無漏淨慧擇滅者擇謂揀擇體亦是慧無
爲生空之理方是涅槃通有餘無餘但身智存名有
餘身智灰名無餘耳疏論語文卽季氏篇吾聞其語
矣未見其人也○疏超越也者以前云不出有無今

云超出有無○疏問以等者兩對中皆上句問下句屬以證涅槃是真有無是俗仁王經者初卷云了知一二非一非二卽勝義諦取著一二若有若無卽世俗諦○疏不待皆非者若有無互不相待亦互不生起○疏皆是緣有者無雖無體以有求之必有此無故無亦緣有之法豈足下謂有唯有邊無但無邊各偏互違奚比乎非有非無之中哉○疏初句等者謂色聲等法是識所緣故名爲境空汗淨心故名爲塵皆緣生下但俗諦所收○疏髣髴等者謂比擬其理法象之也相絕者釋託情絕域言亡者釋得意亡言

也但可下意云謂涅槃是有是無情計分別非有非無令人亡情會理是立言之本意若云非有非無是涅槃亦認指是月服藥成病俱未免其知覺之妄○疏紛繞等者謂紛紛繞繞煩亂之貌惑業皆然也三有者謂欲有色有無色有引出者法華第一云衆生處處著引之令得出但假下意謂無爲亦權指無實故彼經第三說化城譬喻但導師方便爾廣示如玄談故論云借無以示虛設令非其有者令非斥棄逐三有生而入無餘非謂非有是斷滅虛無恐儒老下以二家談有無似內宗有爲無爲之名恐彼引內

經爲例謂涅槃爲無故此簡別以示小乘無餘假借
而出有大涅槃則兩不在也一揀者大涅槃也二揀
者假借而非無○疏初句等者前論云豈曰有無之
外別有一有而可稱哉據此不出有無也次句下前
論云良以有無之數止乎六境之內六境之內非涅
槃之宅等據此不在有無○疏二所等者唯擇後句
前二易故不釋○疏初明等者釋前三句以前云不
出不在求悟無處又不許是空廓無體既有其道幽
妙之路可尋故千聖萬聖同其軌轍而歸涅槃非虛
歸也○疏若斷等者謂無其體言誰不在不出乎其

道既存不出有無必在有無如何不出又不在邪○
疏初三句等者名能起於言說相能生於名字心能
現於有無諸相若順顯云由心現相因相生名字因
名字起一切言說也涅槃不尔非有無相故無有無
之名無名故亦無不出不在等種種言說主既無說
實亦無聞疏但略示一隅○疏理事善惡等下軌持
爲法潛用大疏釋大經法非法亦然之旨有無爲法
者亦各任持自性軌則於人令生有無之解無說下
二十一經云不聞者名大涅槃乃至非音聲故不可
說故等○疏令忘名下以不出不在互相違故但寄

名顯妙妙不在名若執名求理名違則理乖何以取
悟故圓覺云修多羅教如標月指了知所標畢竟非
月予嘗至此謬出偈云照文見心理心非文所籌須
知鉤外魚不是魚外鉤○論雖然者縱成前理也善
吉須菩提也心不緣相無心也耳不循聲無聽也此
中要妙識其旨正思正聽隨聞隨得○疏偈蒼下
華嚴離世間品六十種境界無碍用第二云在佛境
界而不捨魔境界無碍用亦如志公云魔從佛境出
佛從魔境生二頭不相辨混雜國王城○疏初句等
者謂雖不離煩惱亦不卽煩惱此實難言故云在乎

妙悟則卽妄而真非捨於妄爾齊觀者卽空色無碍
唯一真之境而已詳論齊有二意一空有無二二心
境同如○疏文似下齊物篇云天地與我並生而萬
物與我爲一等○疏同我者下明唯同唯異皆失亦
同亦異不出不在也亦應具有四句此中但明不出
不在故唯約亦同亦異辨也同我者躡上與我同根
等唯取同義事理相違者潛用法界觀理事無碍義
中第九第十事理相非門相非卽相違也不在者以
涅槃是理理不在於有無事中今若下出唯同之過
也過乃有二一不立有無二不在不成由同下亦彼

第七第八事理相即門由相即故同也不出者涅槃之理即于有無所以不出今若下出唯異之過過亦有二一乖乎悟同二不出不成然古釋皆不如此予詳下結文所以不出不在等理合前後連貫釋之斷無餘惑實性論初卷法寶品云非有亦非無亦復非有無亦非即於彼亦復不離彼彼謂有無也○疏初二句等者且權實一槩而論之由虛冥遍統所以玄也次二句下雖云照理意顯智玄故但云靈鑒有餘則恢恢焉猶有餘地矣○疏承前者論之初句即本智證真次句即後智照俗玄根下既以根喻理故以

拔喻證理無始者絕初際故非照下用生公義意云以相應之慧盡生相時似有其始生相既盡以始同本本來平等同一覺故何始何終故曰非照今有起信下證發心中之文具云又是菩薩功德成滿於色究竟處示一切世間最高大身謂以一念相應慧無明頓盡名一切種智餘文次疏○疏略至下理應有至人二字或簡或失雙示不住者謂即住而不住也大疏釋無住涅槃云由雙住故能俱不住等○疏初二句等者初即心境對說後顯其同則無相無名廓然無寄如無知論以緣求智中廣示○疏通叙等

者以前云菩提之道不可圖度又云六境之內非涅槃之宅等語出下彼說卦中文彼謂窮其造化之理然後盡萬物之性能所以順至於天命今借其辭○疏初四句等者謂一則違三三則又非究竟意以一爲究竟三則小大差別非究竟非究竟則屬無常生滅升降下升降約人修進之說高下約法以明皆差別不一之義○疏理無等者直據理以明之尚無有二何況有三所以究竟故本經二十二云聲聞緣覺所得涅槃等無差別○疏無有二上者疑上是正字卽法華方便品云十方佛土中唯一乘法無二亦

無三除佛方便說正法華偈云佛道有一未曾有二等疏引化城喻者以對論文可見火宅者彼第二略云有大長者財富無量其家廣大唯一門有五百人止住其中堂閣朽故梁棟傾危周帀俱時燼然火起長者諸子在此宅中念言我雖於此安隱得出而諸子等無求出意長者語言此舍已燒宜時疾出而諸子等樂著嬉戲不肯信受爾時長者更設方便而告之言汝等所可玩好希有難得汝若不取後必憂悔如此種種羊車鹿車牛車今在門外可以遊戲爾時諸子聞父所說玠玩之物爭出火宅等釋曰三車

如其次第卽喻三乘火宅喻於三界故彼經云而爲
三界火宅所燒等○疏三乘等者如諸子差別所樂
各殊同免火宅之患無差別也所乘等者依大鈔釋
也彼說三乘各有教理行果今略就教行釋之教者
下法華方便品云依一佛乘分別說三詮示四諦之
法名聲聞教詮示十二因緣之法名緣覺教詮示六
度等法名菩薩教行者下略而言之則聲聞觀四諦
之行緣覺十二因緣之行菩薩悲智雙施自他等運
之行廣說如彼統其下卽會三歸一之義廣釋如玄
談○疏習結等者結謂結餘卽習氣纖細尔三乘下

聲聞能盡煩惱現行不能盡習氣緣覺分斷習氣菩
薩位滿種習皆盡○疏初句等者謂一切衆生本有
之性唯一無差夙熏之緣小大誠異論隨新熏故云
不一謂曾於大乘法中熏習成大乘性識心樂欲亦
唯大乘餘二例之雙照下以大乘雙斷二障故鑑二
空之理爲深二乘唯斷煩惱障鑑我空理故爲淺也
○疏由識根等者亦承前以明差別在乎識根識根
則小大不同智慮則淺深成異餘疏易見爲力下智
力有小大尔○疏由前等者卽難差中所引放光等
放光三差在三乘智力之淺深非無爲有三智論則

如人趣理升降不同非涅槃有差也今引下約教則
法隨人異分一成三約行則人自熏殊會三歸一也
○疏先定等者乃先分定人法道理然後從而難之
○疏初二句等者以法從人人既有三法亦定三以
相卽故又若下三乘之智有爲也無爲可知有無超
然豈不滯於冥會哉○疏以人等者釋一亦無三異
則下如放光云皆以無爲而有差別今既相卽三乘
從何而成差乎○疏無爲例之者謂至無爲之彼岸
卽同無爲之樂文擬下彼二十三云道者同於道得
者同於得失者同於失同於道者道亦樂得之同於

得者得亦樂得之同於失者失亦樂得之然通下尅
其能得唯三乘之智智依於人故疏云人○疏理雖
等者用玄談分教之詞彼云理雖一味詮有淺深等
亦如三獸渡河河雖是一不妨三獸所渡淺深各異
○疏初四句等者網喻三界三鳥雖各出網然力量
有小大翱翔有遠近反責下責前一亦無三等也○
疏三乘等者諸蘊不一名衆和合兆形名生三乘在
於界內卽分段五蘊在於界外卽變易五蘊雖勝劣
有殊皆有漏生死未能轉成無漏五蘊相續心者卽
六塵中第二事識心和合下卽本識心也八地已

去至地滿足方破此識如起信論云破和合識相滅
相續心相等覺已降者謂等覺菩薩生相未盡故
根本無明未滅故未能證極一法界心皆名衆生也
亦前下成立無爲是同三乘是異以人下以人望法
人恒二而法恒一也以法望人法自一而人自三○
疏承前等者難中一亦無三異亦無三今以喻顯法
但顯三乘卽無爲一亦有三者幽鑑之淺深不在
於無爲○疏以未下以三乘之智勝劣有殊所斷惑
障厚薄不同所證之理漸而未深由此階級故成三
差誰云下有名折之如此無名之家不云異而不證

有三異也皆約方便淨涅槃有此淺深非自性淨也
○論萬累者感業不一故名爲萬滋益者春秋傳云
無使滋蔓蔓難圖也今疏十一智者大品第六云法
智比智他心智世智苦智集智滅智道智盡智無生
智如實智爲十一也大論二十三甚廣釋之今略引
云法智者謂欲界四諦下無漏智比智者謂上二界
智他心智者了知欲界色界現在他心等智世智者
諸有漏智苦智者觀五蘊無常苦空等時所得無漏
之智集滅道三各觀本諦所得無漏之智盡智者我
見苦已斷集已盡證已修道已如是念時無漏智慧

見明覺也無生智者謂我見苦已不復更見斷集已
不復更斷盡證已不復更證修道已不復更修如是
念時無漏智見明覺如實智者一切法總相別相如
實證知無有罣碍等準論前之十智三乘共有如實
一智唯佛獨有今論云尔者以大品十地中始自乾
慧至辟支佛地則三乘共履而二乘至此爲極故以
盡智在二乘無學位第九超出二乘名菩薩地故說
無生智在菩薩位不尔何故辟支佛外又立菩薩地
乎如實一智果位圓現故論不說請詳疏中皆依智
論釋之今云下然菩薩有二類一直學法空者二先

小後大者據經中十地施設多約先小後大故論主
以盡智爲二乘無生爲菩薩也盡智則盡見盡斷盡
證盡修無生則印後不起此則二智非太異也故大
鈔或說小乘十智除如實智又云盡無生智二乘車
體等據此二乘亦有無生智但望菩薩淺深有異此
中問意卽大品通教中意以此通被三乘故菩薩亦
藏教中傍化之大如玄談引天台智者四教云一二
藏教此教明因緣生滅四真諦理正教小乘傍化菩
薩等二者通教卽無生四諦通者同也三乘同稟故
此教菩薩斷證行相多同二乘故大鈔第四云丈六

權智是牛車體又辨三乘同修而有八同謂教理智斷行位因果也三者別教卽無量四諦四者圓教卽無作四諦廣釋如彼問曰若尔何異二乘答四弘六度自利利他乃至登見五門合斷三十四心一座成正覺等所以別也○疏放光等者三乘之智許有淺深究竟智體一而無殊如華嚴說十地證智卽佛智故况智因惑起感謝智亡空亦平等故經云尔因邊下釋智體無生顯空也○疏是唯等者釋不體則已以三乘能證之智不相違背所證之理平等無二不證則置之而勿論證則惑可以頓盡理可以頓得云

在疏○疏初二句等者三乘之人於見道前修五停心苦無常等諸觀正伏四諦分別兼伏九地俱生至世第一出心見道位初方斷分別至修道位起九無間以斷九地修惑九解脫道中漸漸證理如何頓也此依藏教五位釋之疏中依通教地位叙之此教亦有十地三人同歷一乾慧地大論七十五云聲聞人獨爲涅槃故精勤持戒集諸善法雖有智慧不得禪定水不能得道故名乾慧則煖位已下也菩薩從初發心乃至未得順忍亦有此名二性地聲聞從煖位已去至世間第一法菩薩得順忍愛著諸法實相亦

不生邪見得禪定水三八忍地聲聞從苦法忍乃至道比忍是十五心釋曰謂世第一出心緣下界上界四諦共一十六心初緣下界苦諦有苦法忍苦法智次緣上界苦比忍苦比智蓋以法智緣下比智緣上也亦云苦類忍等是下地類故如是至道比忍有十五心於中有八忍七智今從忍名故云八忍也菩薩則無生法忍入菩薩位釋曰仁王般若說無生忍七八九三地得之卽了法無生亦無有滅如中論諸法不自生等如前具引今以義準之乃七地下品無生忍非二乘無生智也四見地卽第十六心道比智見

道入離生正位得須陀洹果菩薩則阿鞞跋致此云不退然論釋阿鞞跋致位寬有云初地已上乃至八地等五薄地聲聞或須陀洹或斯陀含斷欲六品俱生煩惱唯下三品在欲界之惑薄故菩薩過阿鞞跋致乃至未成佛斷諸煩惱餘習亦薄六離欲地聲聞已盡欲界三品離欲界生得阿那含果菩薩離欲因緣故得五神通七已作地聲聞得盡智無生智得阿羅漢菩薩成就佛地八辟支佛地準大論翻爲因緣覺先世種辟支佛道因緣今世得少因緣出家亦觀深因緣法成道故名辟支佛九菩薩地從乾慧地乃

至離欲地如上說釋曰準大論前後菩薩道種智中
徧修前之八地而不取證故已作地辟支地不指菩
薩論又云歡喜地乃至法雲是菩薩地等十佛地卽
一切種智上依大論錄之中間難者亦唯以他文釋
之然皆略示而已○疏古譯等者北涼三藏成八十
卷疏中引用皆前後論文○疏緣起等者二十七經
云又未能渡十二因緣河猶如兔馬何以故不見佛
性故十二因緣者一無明二行三識四名色五六入
六觸七受八愛九取十有十一生十二老死皆前前
爲緣後後生起如是十二三法所攝謂無明及愛取

是惑行及有支是業餘識等七支是苦十二因緣論
頌云煩惱初八九業二及與十餘七說爲苦三攝十
二法然此十二三法互因三世輪轉該攝三界通於
四生今略示三世因果之理令識大況謂過去無明
爲發業支現在愛取爲潤業支招識等五支果復由
現在愛取有支感未來生老死小乘三際兩重因果
同此大乘或唯一重則前十支皆因後二支爲果涅
槃經中亦依三世明十二有支二十七經云十二因
緣一切衆生等共有之亦內亦外何等十二過去煩
惱名爲無明過去業者則名爲行現在世中初始受

胎是名爲識入胎五分四根未具名爲名色具足四
根未名觸時是名六入未別苦樂是名爲觸染習一
愛是名爲受習近五欲是名爲愛內外貪求是名爲
取爲內外事起身口意業是名爲有現在世識名未
來生現在色名六入觸受名未來世老死也是名十
二因緣略示如此津謂下如易之未濟既濟之義四
諦者謂三界有漏色心皆逼迫性名苦諦卽三苦八
苦等三界分別俱生之惑增長生死名集諦斷障所
顯無餘之果寂靜名滅諦總別念觀七覺八正乃至
一切菩提分智於三界生死能出能離名爲道諦於

此四中前三世間因果後二出世因果所以果先因
後者於世間中先示其苦令起厭心知苦諦之果乃
集因所招令斷之也於出世中先示其滅寂靜永安
無形患智勞之辛有無爲無餘之樂令起忻心知滅
諦之理由道而證令修之也古人云厭如是苦者斷
如是集忻如是滅者修如是道故如來始於鹿野爲
五俱鄰等三轉此法蓋此意也涅槃下亦二十七具
云善男子觀十二因緣智凡有四種乃至下智觀者
得聲聞道中智觀者得緣覺道乃至上上智觀者得
無上菩提等論語卽八佾篇○疏智慧第一者謂十

大弟子各居一長如迦葉波頭陀目乾連神通須菩
提解空迦旃延論義迦賓羅曆象阿菟陀天眼羅睺
羅密行等若準增一阿含第三卷中說弟子中各有
其能略云寬仁博識如阿若俱鄰善能勸導如優陀
夷恒飛虛空如善肘比丘威容庠序如馬勝比丘精
進苦行坐禪入定如離日比丘廣立齋講如陀羅婆
摩比丘安造房屋與招提僧如小陀羅婆摩比丘等
故北山錄云若五百無學各以其能求之咸居其甲
而非乙也所引涅槃尚云都不識况盡知乎故北
山錄云羅漢不識鹽義外黨諸俗深以爲誚蓋出朽

宅則生死凡夫邈哉何及語外事則解脫聖智或不
如凡夫也然孔子域中之聖而能多知楚王過江得
物而不識使問孔子子曰萍實也可食吾聞之童謠
云楚王過江得萍實圓如斗赤如日剖而食之甜如
蜜吳治塗山得專車之骨以問孔子子曰古防風氏
之骨也大禹會諸侯於此防風後至禹戮之防風長
四十尺也以孔子之多能尚有不知之事如中庸云
夫婦之愚可以與知焉及其至也雖聖人亦有所不
知焉故列子湯問篇云孔子東遊見小兒辨日遠近
一兒曰我以日始出時去人近而日中時去人遠何

以知其然哉兒曰日初出也大如車盖及日中則如
盤盂此不爲遠者小而近者大乎一兒曰我以日初
出而遠日中時爲近何者日初出則滄滄涼涼及其
日中如探湯此不爲近者熱而遠者涼乎孔子不能
決兩小兒笑曰孰爲子多知乎是知雖俗諦之事非
一切種智不能盡知况出世下經意以俗諦爲世間
真諦爲出世間引此兼證下文○疏虛無等者老氏
云致虛極守靜焉又云天地之間其猶橐籥乎虛而
不屈動而愈出又云三十輻共拱一轂當其無有車
之用闕小視也躡踐也等謂等級不可越級而進階

升者論語子張第十九云夫子之不可及也猶天之
不可階而升也○疏劍引等者老氏四十八云爲學
日益爲道日損損之又損以至於無損等如見前下
卽見道之前伏惑見道已去斷惑性宗位次廣則三
賢十聖等如華嚴廣說略則信賢聖果如起信圓覺
等說寄位下卽賢首一乘義分齊中略云謂寄信等
四位以斷滅等四相如起信論中信位斷滅賢位斷
異聖位斷住果位斷生又有斷惑顯位如斷滅相而
顯成信位等廣示如義分齊○疏阿惟下古譯阿耨
多羅三藐三菩提爲此語淨名亦云無以日光等比

螢火○䟽雖別下引經雖別然意中含有前來斷惑之動如下云等是也所以下明譏動之意但欲演其動寂無妨也事理下事動也理靜也清涼教迹云事理雙修依本智而求佛智○䟽方廣等者大乘經中此理攸同入地者初地已去至七地中智相既亡約本智合理身心無相謂言寂也此據本智證理而說非約分段變易而論然細細而求地地之中斷障證真亦分分寂滅今之論意不取如斯但取初地已上已得寂滅之靜如何至於寂滅之靜復存取捨之動乎○䟽勝分者然諸位之中當位之行名爲自分進

後之行名爲勝分約增勝義邊以好尚是心心未寂滅涉求是身身亦未寂○䟽以此四者者卽取捨損益之四文義下謂寂滅與好尚等異戾乖也卽動靜之行相違○䟽南喻等者前引法身已上經文說寂智論說動也如䟽可辨南爲朱明者以五色布於五方則青爲東方亦南白西黑北黃中以五行配之則東方甲乙木南方丙丁火西方庚辛金北方壬癸水中方戊己土故南爲朱明北爲玄冥又离卦屬南象亦明象也○䟽然稟下謂性宗修行必動靜無違止觀俱進事理雙修悲智平等如物不遷云不釋動以

求靜等是也○䟽寂也下涉動名爲爲作也捨動名
無爲老氏亦云無爲而無不爲若云至理無爲則非
四相所遷名無爲故無爲名一亦隨義別○䟽次四
句下以寂而常動故動與寂非一也動而常寂故動
卽是寂非異也後四句下冥真之心理行也涉俗之
心事行也真俗齊照雙流也如儒童菩薩地地之中
身心寂滅不失自分亦地地中進求後位不失勝分
豈云靜而違動不復進求動而違靜不成寂滅故二
行無違方成無住之修○䟽承前等者爲前文每四
句中成一對動靜之義可知○䟽據前下䟽中會身

心互舉推驗前文可見亦無餘義○䟽義如者然論
之上下釋不有不無之名出義各殊今此釋經又成
一義不若有心之有非有也不若無心之無非無也
○䟽衆庶如孝經庶人章之庶人卽蠢蠢無知汎常
之流○䟽爲斥等者聖無妄相故云不有靈照炳然
故云不無○䟽初二句等者由忘絕故所以不有次
二句由智存故所以契理而不無也恒沙下起信相
大中文云所謂自體有大智慧光明義故徧照法界
義故乃至具足如是過於恒沙不思議佛法隨理者
又曰雖實有此功德義而無差別之相等同一味故

唯二真如此義云何以無分別離分別相是故無二
後二句下意云若心想未盡自有我相心想既滅功
自無相清涼心要云寂寂運無涯之照此明寂而常
動也如何積德之動以乘寂滅之靜乎○疏荅問等
者文易不解但出前後之意本經二十一云如來涅
槃非有爲非無爲等○疏智論等者亦取意引之智
論但云施頭目髓腦不云國財蓋舉重攝輕以內例
外乃至者具云持戒忍辱禪定時在山林中身體乾
枯云在疏釋曰下以儒童在七地中見然燈佛依智
論釋智相未盡者前文已釋三輪者一不念能施二

不念受者三不念果報本經二十四略云不見施者
受者及施果報等未或下謂七地已前已斷相續執
取等心由智相未盡滅故三輪未得全空住相下金
剛經云菩薩於法應無所住行於布施不住色布施
不住聲香味觸法布施乃至云其福德不可思量如
南西北方四維上下虛空等以知住相行施則著我
人等相但爲生天之福不得無漏之果施既下例餘
行也謂凡行諸行一一皆須忘相三輪空寂方成出
世之因故清涼云非真流之行無以契真施雖下儒
童得無生忍而忍心施之方契真也故言不貴於多

寡中理爲奇施不貴於重輕契真成要尠少也蹄涔
下蹄跡有水曰名蹄涔施華緣者太子本起瑞應經
略云定光佛興世有聖王名制勝治鉢頭摩大國我
時爲菩薩名曰儒童居山行禪聞世有佛心獨歡喜
披鹿皮衣行欲入國會五百道士論說道義師徒皆
悅各送銀錢一枚菩薩受之入城見民治道洒掃燒
香卽問行者荅曰佛來入城菩薩大喜今得見佛當
求我願王家婢名瞿夷過水餅密持七莖青蓮花儒
童卽探銀盡用與之女貪銀寶與花五莖自留二枚
廻別意疑此何道士披鹿皮衣不惜銀寶追呼男子

以誠告我菩薩云欲以上佛求所願也瞿夷曰善請
寄二花亦獻於佛須臾佛至國王臣民拜謁散花花
悉墮地菩薩見佛散五莖花皆止空中後散二花仕
佛肩上帝知至意因記之曰汝自是後九十一劫劫
號爲賢當得作佛名釋迦文菩薩受決疑解望止便
逮清淨不起法忍放光下釋空行菩薩由修三空故
名空行三空無相卽成寂靜行五波羅卽爲動也○
疏賢劫下第三具云一切諸法無有與者而自逮得
以是勸助救諸窮匱是曰布施成具下卽成具光明
定意經頌云不教令自行不爲而過爲等禪經下坐

禪三昧法門經下卷具云是慈三昧略說有三種緣
生緣法緣無緣諸未得道是名生緣阿羅漢辟支佛
是名法緣諸佛世尊是名無緣思益卽第一云以無
所得故得以無所知故知所以者何我所得法不可
見不可聞不可覺不可識等○疏初二句等者責前
有名動而違靜淨名下香積佛國品略云舍利弗心
念日時欲至此諸菩薩當於何食乃至維摩詰化一
菩薩往上方界度四十二恒河沙佛土國名衆香佛
號香積與諸菩薩方共坐食到彼詞曰願得世尊所
食之餘當於娑婆世界施作佛事於是香積如來以

衆香鉢盛滿香飯與化菩薩與彼九百萬菩薩須臾
至摩詰舍等至菩薩品云爾時衆香菩薩合掌白佛
我等初見此土生下劣想今自悔責諸佛方便不可
思議度衆生故現佛國異唯然世尊願賜少法還於
彼土佛告諸菩薩有盡無盡解脫法汝等當學何謂
爲盡謂有爲法何謂無盡謂無爲法如菩薩者不盡
有爲不住無爲何謂不盡有爲謂不離大慈大捨大
悲乃至教化衆生終不厭倦何謂菩薩不住無爲謂
修學空不以空爲證修學無相無作不以無相無作
爲證等釋曰此明菩薩具修有爲事行而無爲之業

修而不住事行動也理行靜也二行雙修動靜何違
彼疏下卽四注巖公之言慧心不明者謂不修事行
寂而無照缺一切種智○疏隨一爲源者謂涅槃爲
源有不因修成之過衆生爲源涅槃有始成之非如
下具示○疏反顯等者謂乘是車乘故疏云控御以
明反流向源衆生乃三乘之本三乘屬因修涅槃卽
果證○疏有始等者大經第二十八云善男子涅槃
無因而體是果何以故無生滅故乃至云無始終故
等豈不相違○疏有不因等者出過細研有名之意
謂涅槃之理因修而生卽大經本無今有之義權小

之見也未知此理是了因所了非作因所作故本經
二十一云一者作因二者了因如陶師輪繩是名作
因如燈燭等照暗中物是名了因善男子大涅槃者
不從作因而有唯從了因了因者所謂三十七助道
法六波羅蜜是名了因是知三乘之修但修了因之
智以盡集諦之惑惑盡之時涅槃自顯豈涅槃之性
修而後成哉○疏生公云者依大鈔引卽涅槃疏序
釋大涅槃之義稱常下續云常必滅累復曰般泥洹
尔寂照鑑公引涅槃心鏡鈔云生公造涅槃疏五十
餘紙唯解槃根錯節難解之處於是經宗大開奧藏

稱爲關中疏演此下謂方便淨卽三乘之智智有淨
惑之能爲方便涅槃智性本有亦自性涅槃以理智
必相融攝故○疏聖人等者謂三乘聖智皆有冥契
之功今言至人唯目如來以三乘冥理未極未免有
象如來冥極可謂無象心雖下釋無象而成象也謂
聖人以方便淨契合自性清淨涅槃此性舉體爲一
切法也故論云萬物無非我造○疏會證等者謂聖
人了乎萬物本空卽是自性由證萬法以成聖人如
華嚴梵行品云知一切法卽心自性等正與此義相
符大經二十五云佛告生名婆羅門言我今此身卽

是涅槃楞嚴下第二卷文清涼云一念相應一念佛
念念相應念念佛石頭者卽唐代南岳石頭山希遷
禪師也無已者卽無我也靡無也然卽萬物而爲心
故云無所不已誰云下言無自他之別無非已之法
身也杜順和尚法身頌云懷州牛喫禾益州馬腹脹
天下覓醫人灸猪左膊上亦以法身體同無自他之
別故圓鑑智也卽寂之照故云虛照體玄者謂卽心
之性卽萬象而非萬象故云體玄自現者以萬象本
虛法身自現尔評曰諸祖拈示依禪者斷例不容更
注恐轉落情識瞎人智眼不如忘言體會內悟爲得

今且向流通會上略犯脣吻令人速入隼林間錄末
明師於天台韶國師會中負柴至門忽一枝墮地聞
乃悟之說偈云樸落非他物縱橫不是塵山河及大
地全露法王身非他物者以身非外來發已聞性聲
性聞性無二性也南北曰縱東西曰橫言舉聲之相
卽我聞性非是聲塵後二句意云此聲既尔山河萬
象無非我之法身○疏初二句等者如華嚴宗不證
大方廣何成佛華嚴若非佛華嚴亦不證大方廣人
法相卽一體無外○疏初文等者大品第九具云不
應色中求般若波羅蜜多亦不應離色求般若波羅

蜜等放光第九云須菩提告拘翼言般若波羅蜜亦
不於五陰中求亦不離五陰中求等涅槃卽二十七
次云佛者卽是佛性何以故一切諸佛以此爲性故
以緣起卽如故云見法卽是見佛如智非異皆證前
云聖不異理也○疏前引等者示論文前後血脉也
此文極難故疏細示之清涼下玄談文性宗斷證之
理實異他宗如大疏云照惑無本卽是智體又云照
體無自卽是證如鈔云若以智會如非真如矣冥真
下卽教迹叙體大也佛用下卽宋高僧傳說兩種語
一蘇漫多謂汎尔平語言辭也二底彥多謂典正言

辭佛說多依蘇漫多意在於義不依於文又被一切
故若底彥多非中下所能解故方便下論主觀機設
教中華之人尚文賤朴文質彬彬始爲可觀故此論
文爲千古希唱高人達士寶而玩之逗猶通也封文
下謂封滯於文不見其義之流謂濫同儒道之理贊
寧者卽宋初時僧作高僧傳三十卷彼傳第三譯經
科謂云若用外書須招彼謗今觀房融潤文於楞嚴
僧肇徵引而造論宜當此誚等評曰房融文士不當
用書而潤經肇公通人何妨徵引而作論以經是佛
言論是自語也慧達者卽陳朝僧嘗序此論彼序云

世諺云肇之所作固並成實真諦地論通宗莊老所
資孟浪之說此實巨蠱之言欺誣亡歿街巷陋音未
之足拾孟浪者孟大也浪虛也愚瑣者愚謂愚昧瑣
謂細瑣立言下卽論主立論之本意不害下不以辭
故害意也故今下謂古釋見文似莊老多以莊老之
義釋之如予則多出彼意然後依內教釋之雅言者
毛詩有大雅小雅雅正也文雅也令知下論主本假
儒者之辭以示佛理非卽文而雷同於老莊也○疏
顯前等者此義前後多出不復更示一念下亦心要
攸依圓教者彼經無古今之名有三世之說獨李長

者合論云十世古今始終不離於當念謂古今卽三世也二相卽入者乃十玄門中十世隔法異成門依此以辨時世圓融亦有二門相卽乃諸法自在門相入乃一多相容不同門但十門之異通異體相卽相入十世隔法唯同體相卽相入也本末下本卽涅槃之理末卽萬物之事窮本卽萬法而皆涅槃極末卽涅槃而恒萬法情非情下杜順和尚頌云情與無情共一體處處皆同真法界染謂染緣起非染可知○疏二文互影者前文但言不離諸法不言無邊後文但言無邊不言不離故云互影○疏如智等者心境

雙亡名曰玄寂玄寂無名故假寄無極之名以顯玄寂之理故疏云非別等○疏三乘下意謂三乘等人先證涅槃名進後證涅槃名退故非先後已證則真同故○疏淨名下卽第二觀衆生品云時維摩詰室有一天女見諸大人聞所說法便現其身卽以天花散諸菩薩大弟子上花至諸菩薩卽皆墮落至大弟子便著不墮一切弟子神力去花不能令去尔時天問舍利弗何故去花答曰此花不如法是以去之天曰勿謂此花不如法所以者何是花無所分別仁者自生分別想耳若於佛法出家有所分別爲不如法

若無所分別是則如法觀諸菩薩花不著者以斷一切分別想故譬如人畏時非人得其便如是弟子畏生死故色聲香味觸得其便云云舍利弗言天止此室其已久如荅曰我止此室如耆年解脫舍利弗言止此久邪天曰耆年解脫亦何如久舍利弗默然不荅天曰如何耆舊大智而默荅曰解脫者無所言說故吾於是不知所云天曰言說文字皆解脫相等釋曰天女之意以時無實體妄心所現久非定久近非定近如夢所度何長何短故示云如耆年解脫時相本虛卽解脫故身子又謂解脫是久遠之法以法取時

而云久也故天女云云評曰準淨名疏天女卽居士之家神所在皆隨主人之高下摩詰旣聖人示迹故家神亦菩薩權形此經本抑小揚大故身子亦示其言屈令慕小者得速返也○疏九折等者總叙折意也所以以下叙一論之始終也謂始示涅槃之體次乃一折一演判決簡擇令人識悟有餘無餘權應假號大般涅槃無名無相非有非無不出不在而妙道存焉三乘之人同修同歸直由智力淺深乃成三異非謂無爲三於三乘次明三乘斷證之道重惑不可頓祛無爲不可頓證要損之又損之而方淨益之又益之

以漸圓而積德涉求不違寂身心寂滅不違動動靜
不違於妙行則有無不係於靈臺三乘建入證之深
因一理獲圓成之妙果心境冥會終始如如進之弗
先退之弗後至此究竟乃問得之之方存陰盡陰等
故今折之也○疏初二句下謂五陰卽衆生之體陰
外無別衆生故論云極於五陰之內○疏順經等者
以前引經得涅槃者五陰都盡故也有內者謂三有
之內也○疏存陰等者以陰存故有能得之人故爲
順理又却違經以聖教是定量故違經談理令誰服
從一應下亦依假設也陰外何有衆生之性以經云

五陰都盡而得涅槃故今論云果若有得則衆生之
性不止於五陰此則順理違教二恐違下順教出理
也盡麤下亦隨理而釋之無別教證謂有名之意必
要有能得之人得所得涅槃五陰苟盡誰爲能得故
疏云尔此意下明折演之意折意是三乘權漸必存
能得所得演意卽一乘終實顯本來卽是能所雙亡
也○疏前演下明承前起不存者不存能得所得之
相方爲玄得下論云然則衆生非衆生誰爲得之者
等○疏忘得下以涅槃但是修顯之果故疏云從此
而顯○疏法真等者法謂做法謂涅槃之真離一切

相智法倣真亦忘得相妙契其真同於真也依偽下
卽妄想心也妄想之心能所兩分智若有得卽同妄
想○疏有得者下亦情見未盡不能契證故云有得
無得者下謂情盡見除全忘得相與理契合故云得
也二十三經云若使如來計有得相是則諸佛不得
涅槃以無得故名得涅槃等心經下具云無智亦無
得卽能所雙亡也由雙亡故三世諸佛依無得之般
若得阿耨菩提等○疏言隨等者法謂諸法之體謂
一切言說皆隨所說之法而生起旣談下釋論中若
卽涅槃等涅槃下釋論中誰獨非涅槃等起信下具

云一切諸法唯依妄念而有差別若離心念則無一
切境界之相是故一切法從本已來離言說相離名
字相離心緣相畢竟平等無有變異不可破壞唯是
一心故名真如又云言真如者亦無有相謂言說之
極因言遣言此真如體無有可遣以一切法悉皆真
故亦無可立以一切法悉皆如故釋曰以真如卽涅
槃故所以引證故出現品云佛子菩薩摩訶薩欲知
如來大涅槃者當須了知根本自性如真如涅槃如
來涅槃亦如是等此則自性清淨涅槃也○疏融洽
故等者疏意問而釋之由融洽二儀所以天人一理

由蕩滌萬有所以一異同源約見聞下謂色性聲性
卽自性故不見不聞者卽前云五目不覩其容耳聽
不聞其響○疏如來非衆生者真妄異故非非衆生
者性無二故如來卽涅槃者亦經正文○疏生死等
者圓覺經金剛藏略云譬如幻翳妄見空花乃至云
生死涅槃同於起滅等釋曰謂生死無實隨緣起滅
如翳眼見空花也陽燄者謂春月陽氣發生渴鹿認
之爲水楞伽等經皆說一云中水影有時而現實
亦無水疏取前論大患未滅超度四流以釋之以是
自性清淨涅槃故生死如空花四流如陽燄若方便

淨者空花雖虛亦須除翳陽燄雖假亦須滅想故圭
山云佛本是而勤修惑元無而須斷以衆生處幻夢
之鄉受虛妄生死生死雖虛依然流浪煩惱元假法
尔燒然豈其獨特天真便云了道全忘進習卽謂還
源故起信云若人雖念寶性不以方便種種磨治終
無得淨○疏此以義等者予遍尋放光並無成段之
文如論者故知論主合集經義而引之薩婆若卽一
切智準此經義論云從有得邪從無得邪等四句皆
答云不後文第五云不逮正覺猶云都無得邪亦答
云不也文少左右旨中無違○疏無得等者真忘得


也通同也謂方便淨同自性也釋論中誰獨不然若云新得何時失之故楞伽下魏譯云大慧一闡提者有二種一者焚燒一切善根謂謗菩薩藏二者憐愍一切衆生卽大悲菩薩大慧問言此二者常不入涅槃佛告大慧謂大悲菩薩何以故以能善知一切諸法本來涅槃是故不入涅槃非捨一切善根闡提等如是卽圓覺如來責剛藏三問之言○疏此有等者據論意約境說得約心說知約形言見約聲音聞疏意約玄得之意以辨之故云皆下句辨得也謂得知得見得聞也絕域者非世間出世間故如何云

獨建三有之外哉故前表云排方外之談是也非俗者無分別心非緣慮也大象大音文借老氏不存相下卽性而見見見爲普眼不循聲下不循聲而聞聞聞則普聞是故下卽莊子天道篇如前引離朱乃古之善視者見秋毫於百步之外觀音下卽楞嚴第五說二十五聖圓通觀音菩薩於耳門得之經略云返聞聞自性聞復翳根除等慈覺禪師頌云返聞聞處不聞聞無限勞生入普門瀑落斷崖聽不盡烏啼猿笑又黃昏○疏顯涅槃下疏中叙論之前後血脉可知出現下謂出現品中示涅槃用大如經云佛子

來住於無量無碍究竟法界虛空界真如法性無
無滅及以妄際爲諸衆生隨時示現本願持故無有
休息不捨一切衆生一切刹一切法大疏釋曰初住
實際故不住生死後不捨衆生故不住涅槃由雙住
故能俱不住前卽大智後卽大悲大悲般若常所輔
翼所以名爲無住涅槃又云自性涅槃衆生等有二
乘無學容有前三唯佛世尊獨言具四故就無住總
以結之卽安住涅槃建大事也今此論中四種二種
涅槃之理隨義發明或前或後末後依證得之體起
廣大之用有餘無餘旣皆應生之用則無住之義亦

含具也可思至哉下羨論成立之巧也清凉謂論主
宗出現之經而作此論細揣其旨良有所以故今疏
鈔皆引大疏之義斷之三語者卽上語中語後語記
錄下北山錄宗師議篇云或說什門四聖卽生也肇
也融也徹也生公十四科等玩味無斃若驪龍之戲
玄珠也今古下謂肇公獨絕無人繼者方之寶藏相
去實遠斷非法師所作後世依倣而託之者也名德
下準裴公休清凉碑述大師所好之法云肇公四絕
論融才解英絕學博外內尤能聞持故有題之昂昂
道融師精識不可挫日誦十萬言經日不再過僧

謙虛內敏學與時競深爲秦主賞識稱是四海標
七菁凉好之尚且如此其他可知囊括者易坤卦六
四云括囊無咎無譽彼意謂人之慎言不出如囊括
其口也老書者七十三中文有本云踈而不失謂人
之善惡上天必以吉凶應之而無漏失卽尚書云福
善禍淫是也吾經亦云諸天善神記人罪福毛髮無
遺○踈八師下準支謙所譯亦名邪旬邪旬問佛所
事何師佛言然有八師卽不殺等五戒及老病死經
意觀老病死持前五戒故通爲八與人天八戒有殊
○踈九折等者通示大義有名以三乘自宗之理折



ケノ十